

47

PLEKABUKIL

plo

Katolels

fa

Koglgruber Kayetan.



— 1888 —

Linz 1888.

Pab komitātik bukatedama ebenhōqik (Henr. Korb).

700424-A



47

Büpüked.

In nem Goda Fata, e Sona, e Santikäla. Jenosöd.

Plek gödelik.

O God, Jafal e Konseföl dinas valik; danob ole se lad lölik oba, das eplesefol obi in neit at neletü bad alik. O Fat gudlikün! givolös obe segun misalad gletik ola beni, das konsefob obi neletü sins tudel ed in dels valik lifa oba. Jelolös obi neletü bösulams neflenas oba e konsefolös obi neletü bads lana e kopa. Valikosi, kelosi tudel otikob, opükob, odunob ed oliedob, vilob o God al stim ola tikön, pükön, dunön e liedön; ab i yufolös obe, stenüdolös vili fibik oba, dat lefulob i valikosi, kelosi nu edesinob. Jenosöd.

Sölalaplek u Fat obas.

O Fat obas, el in süls! paisa-
nükomöz nem ola! kömomöz leki-
nän ola! jenomöz vil ola, äslik in
sül, i şu tal! bodi delik obsa givolös
obse tudel! e fögivolös obse debis
obas, äs id obs aifögivobs debeles
obas! e no nindukolös obis in tenüdi,
sod aidalivolös obsi de bad! Jenosöd.

Glid lanelik.

O Maria, binolöd paglidöl! binol
benafulik, Sölal binom ke ol! binol
peläbädöl bevü voms, e binom
peläbädöl fluk kopa ola Yesus!
O Maria sanik, godamot! begolös
ple obs sinels pöfik, nu ed in düp
deila obsa. Jenosöd.

Lanel Sölala u plek lä glökön al plek.

Lanel Sölala äblinom Maria'e
nuni, ed älegetof fa Santikäl. (Sukom

bal glid lanelik.) Maria ägesagof:
 Eko! binob jidünan Sölala, jenosöd
 obe segun vöd ola! (Sukom bal
 glid lanelik.) E vöd evedom mid,
 ed elödom bevü obs. Kop binom
 beatik, kel epolom oli, e dögs
 binoms beatiks, kelis esugol! (Sukom
 bal glid lanelik.)

In dödel:

Plek al meb deilatlepa Kristusa.

O Yesus Kristus, Sölal meilädi-
 kün! kel esufol tlepi nesepükik e
 glumami demü sins oba e sins vola
 lölik, espilol suetatofis bludik, e pe-
 stenüdol in deilatlep ola fa lanel,
 givolös, das divodob in lied, tlep
 e misalöf alik in vili godik; plekob
 ko devod e lelad, dat dagetob flodi
 in lied alik e nämäli ta tenüds
 valik. E ven füdo deilatlep oda-
 gleipom obi, täno yufolös obe, al
 bevikodön ati, e dukolös obi in
 kinäni sülik ola. Jenosöd. (Sukom

bal sölalaplek e bal glid lanelik.)
 O Yesus! lifob ple ol, deilob ple
 ol, vilob lönön ole edeilöl e liföl.
 Jenosöd.

In flidel:

Plek al meb deila Kristusa.

Daegs evedoms, ven Yesus
 Kristus päkluzüfom e za düp zülid
 Sölal Yesus ävokom ko vög kleilik:
 O God oba, o God oba, kikod elüvol
 obi? O Fat, komedob tikäli oba, in
 namis ola! E ko kap bieгол ädeilom.

O Yesus Kristus! leplekobs e
 pliedobs oli, bi edalivol voli me
 kluzif sanik ola. (Sukom bal sölala-
 plek e bal glid lanelik.) O Yesus!
 lifob ple ol, deilob ple ol, vilob
 lönön ole edeilöl e liföl. Jenosöd.

Klödakoef postelik.

Klödob len God Fat, Jafal le-
 mekik süla e tala. Klödob len Yesus

Kristus, Son balpemetöl oma, Sölal
 obsa, kel binom pelegetöl fa Santikäl,
 pemotik se Maria vilgin; eliedöl
 du Ponzius Pilatus, pekluzüföl,
 edeilöl e pesepöl; edexänöl in bihöli;
 denu elesustanöl in del kilid de
 edeilöls. Esuixänöl in süli, siedom
 al det Goda, Fata lemekik. Köa
 okömom al cödön lifölis ed edeilölis.
 Klödob len Santikäl, glüg lebalik,
 sanik, valemik, kritik, tuced sani-
 kelas, delet sinas, lesustan mida e
 lif tentüpik. Jenosöd.

Dö tugs godik kil:

Klödapläg.

Klödob len ol o God velatik,
 kilbalodik, Fat, Son e Santikäl,
 kel elemekol, konsefol e regol vali-
 kosi, kel mesedol gudikosi e pönol
 badikosi. Klödob, das Godason eve-
 dom men al dalivön obsi me deil
 omik len kluzif, e das Santikäl
 sanükom obsi me ben oma. Klödob e

koefob valikosi, kelosi Yesus Kristus etidom, kelosi postels epredoms, e kelosi gltig sanik, romik, katolik bitopom obes al klödön. Klödob valikosi atos, bi ol o God emanifamol atosi, kel binol velat tenüpik e sap nefinik, kel ni cütön, ni pacütön kanom. O God mödolöd klödi obik.

Spelapläg.

Spelob e konfidob o God su gud nefinik ola e misalad, das ogivol obe lesevi, pöniti velatik e fögivi sinas oba demü melids nefinik Yesusa Kristusa, Sona balpemetöl ola in lif at, ab pos deil ogivol ed ogevol beati tenüpik, logön oli de logod al logod, e löfön e juitön oli nen fin. I spelob fa ol medis zesüdik al dagetön valikosi atos. Spelob fa ol atosi, bi ebömetol atosi, kel ol binol lemekik, fiedik, nefino gudlik e misaladik. O God stenüdolöd speli obik.

Löfapläg.

O God obik! löfob oli se lad lölik oba plu valikos, bi binol gued geilükün, nefino lefulik e löfa alik digik. I sukü löfob oli, bi binol vemo gudlik kol ob e jafäds valik. Vipob se lad lölik, das löfob-la oli leik, äs dünans fiedikün ola löfoms ed elöfoms oli; ko kelas löf bala-mob löfi nelefulik oba; o Sölal mödolöd ati in ob egelo plu e plu. Bi nu vipob löfön känüdiko e le-ladliko oli, e steifob fefiko dunön atosi, so binos liedik obe se lad, das ezünob oli, guedi geilükün oba, keli löfob plu valikos, Jafali oba, Dalivali e Sanüköli oba, Sölali le-mekik e Cödeli cödik. Desinob fefiko vitön sinis valik sa pöts badik valik, pönitön aiplu badodis pedunöl, meditön ofen badugi sina e nevelo dunön ta vil sanikün ola; lasumolös denu obi as cili olik, e givolös beni obe al befulön desini oba.

Dem atos begob oli me melids nefinik
Sona godik ola, Sölala e Dalivala
obsa, Yesusa Kristusa. Jenosöd.

Levitimapleks.

Du sanälel pükom slepapleki.

In nem Fata, e Sona, e Santi-
käla. Jenosöd.

O Yesus! edäblinol vitimi fiku-
likün e gletikün, ekösekol lifi ola
plo mens obs len kluzif, espilol
bludi sanikün ola ple obs, dat
panösoms sins obsa; sikod i vitim
at panemom vitim bludik godafeda
nulik. Ab id edäblinol vitimi ne-
bludik lä vendelafid lätik, edälofol
kopi sanikün ola e bludi sanikün
ola al juit. Vitimi nebludik at i
däblinom nu sanälel su latäb uso;
e no kanom sibirinön vitim, kel
äbinom-la Gode lesunikum e plidi-
kum, ka at, bi o Yesus, Godason
balpemetöl e palöfölin oli it däblinol

Fate sülük. Vilob i nu dunode at sanälela läson ko devod gletikün e begob oli o Yesus, givolöd, das dilsumob len bens, kels se dunot sanik at lüflumoms klödeles. Do binob men sinik, deno spelob e konfidob fa ol dagetön benis at, bi binol misaladik ed ekömol al sükön sinelis e mekön beatikis. Bi lesevob e pönitob sinis oba, ofögivol obe ed ogevol benodi levitima sanikün at.

Du sanälel pükom: „kyrie eleyson“.

O Sölal, misaladolöd obi e menis valik su tal!

O Kristus, misaladolöd obis!

O Sölal! misaladolöd obis!

Du sanälel pükom: „Gloria“.

Stim binomöd Gode in geils e püd menes su tal, kels labedoms vili gudik! So ekanitoms lanels, ven ol o Yesus äkömol in tali at. O Yesus! i mens obs lobobs e

pliedobs oli e danobs ole plo gud
 ola, ben e misalad. Binol gä Goda-
 son velatik balpemetöl, Reg e Sölal
 süla e tala, Godaliäm sanikün, kel
 mosumom sinis vola. Binol Cödel
 cödikün, sapikün e valüdikün.
 Siedol al det Goda Fata lemekik,
 e vilol i menes mökön siedi in sül.
 Si, begob oli o Yesus, lasumolöd
 in süli obi e menis valik, kels len
 ol klödoms, su ol speloms ed oli
 löfoms, äs dünans fiedikün löfoms
 ed elöfoms oli. Velatö! tän olobobs
 ed opliedobs oli tenüpo togo ko
 lanel e sanikels valik. Jenosöd.

Du sanälel lilädom: „epistel“.

O Yesus! noe etidol it du yels
 kil, soi eninsiadol tidelis, kels äsö-
 toms tidis ola veitikumo pakön in
 vol. Büfo esuixänol in süli, epükol
 it posteles: Gololsöd in voli lölik,
 predolsöd gospeli netes valik, e
 postels e züpels ola eföloms komiti

at. I sukans omsa, bijops e sanälels dunoms somo nu, e steifoms tidis godik pakön in dilis valik vola to töbs gletik, pöligs plulik e bösuls laik. Mödiks mils menas lensumoms tidis at ed i segun äts lifoms. O Yesus, vio löfafuliko ekudol plo füd alik! Vilob it i tidis valik, kelis bijops e sanälels glüga sanik ola predoms, lenlilön so, äsif äkömoms-lase mud lönik ola, ed atis fölon egelo e kulädiko. O Yesus, stenü-dolös desini oba!

Du sanälel lilädom: „evangelium“.

O Yesus, Dalival oba! nonik lanel kanom nuni gälsikum blinön de sül, ka ob it eblinol. Epesevamol ä vili Fata sülük, ä lönügis godik oma, äs lemeki oma, gudi, väsapi, cödi gletikün. Emanifamol, das lan mena binom nedeilik, das osibinom lesustan kopa, das gudiks so pomesedoms, e badiks so popö-

noms, äslik öts melidoms. Epükol in leigüds e nen leigüds. Ezepol tidis valik ola ko levobäds nenu-mik, e valikos, kelosi eplöfetol, ejenos. Ol it edunol valikosi, kelosi etidol. Egivol obse sami in tugs valik, in lobed, danöf, mieg, sufäd, misalad. Vio lügik äbinosöv, ifno ikömol-la in voli; te nenolug e pölub äsölomsöv bevü mens! Ol binol lit velatik, kel ekömom in voli e dalitom valikosi. Ol binol letidal gletikün vola e ditibel benas valik. Velatö! tids ola no falomsöd lä ob su gluni neflukik, sod sötoms nüd-lanön dibiko in ladi oba, ninvulön, flolön e flukis magifik blinön.

Du sanälel pükom: „kredo“.

O Yesus! nolob, das nö sätos, klödi in lad polön, sod das zesüdos ati i ko mud koefön ed in vobäds manifamön, ibo klöd nen voböds binom edeilöl. Nu vilob pükön in

siäm sümiko äs sanälel: Klödob
 len God Fat, Jafal lemekik süla
 e tala. Klödob len Yesus Kristus
 Son balpemetöl oma, Sölal obsa, kel
 binom pelegetöl fa Santikäl, pemotik
 se Maria vilgin, eliedöl du Ponzius
 Pilatus, pekluzüfö, edeilöl e pese-
 pöl; edexänöl in bihöli, denu ele-
 sustanöl in del kilid de edeilöls.
 Esuixänöl in süli, siedom al det
 Goda, Fata lemekik. Köa okömom
 al cödön lifölis ed edeilölis. Klödob
 len Santikäl, glüg lebalik, sanik,
 valemik, kritik; tuced sanikelas,
 delet sinas, lesustan mida e lif
 tenüpik. Vilob koefön nen mena-
 dled komü vol lölik o Yesus, das
 lenlogob oli as Godi e Sölali geili-
 kün. Vilob koefön, das kanob tuvön
 te in ol sani velatik oba. Vilob
 bufumo liedön bösulis gletikün,
 sägo äsi matürals vitimön lifi oba,
 ka oli o Yesus fenesiön. Vilob
 klöde oba blinön fiedik, jüs odeilob.

Du pavitimos.

Nog binos atos, kelosi sanälel us su latab sumom in namis oma, te bod e vin, ab lesun o Yesus! poceinom bod in kop sanikün ola e vin in blud sanikün ola. O Yesus! sanälel ovitimom oli it Gode Fate sülik, e Fat sülik vitimi at olen-sumom ko plid gletikün. Id ob vilob vitimi däblinön. Vo, o Fat sülik! vilob vili oba disojedön löliko vile ola. Vilob dünön ole se nämä valik oba, vilob delavobi alik se löf al ol beginön, fövön e lefulön. Vilob vitön sini alik, seyilön pöliges al sins, bevikodön sinikis slopis. Vilob klemön gälis nepedälik valik. Flagolöd fa ob aikelosi, vilob atosi lovegivön ole, labemi oba, sauni, lifi. Letolöd te lesevön obi, kelosi vilol, e vilob atosi dünön.

Ven paglökos al „sanktus“.

O God! binos pötik e cödik das geilob siämi oba e ladi al oli,

das danob ole plo bens e benods
 valik ola, das lobob e pliedob oli.
 Velatö! lobomsöd e pliedomsöd oli
 jafäds valik in sül, su tal e diso
 tal. Pliedomsöd oli regs e pops,
 e lanels e sanikels valik! Binans
 valik, kels laboms lifi e vögi, gälo-
 komsöd, yubomsöd e vokomsöd
 kleiliko: Sanik, sanik, sanik binom
 God, Sölal obsa! Sül e tal binoms
 fuliks ko glol omik, gud e misalad!

Lä sutovam vitimaboda sanikün.

O Yesus! klödob, das binol is
 plisenik jenik e lifik in föm boda
 as God e men togo. Leplekob oli ko
 devod gletikün, ko dlestim e mieg.
 O Yesus, lifob ple ol, deilob ple
 o', lönob ole edeilöl e liföl! Jenosöd.

Lä sutovam gleköpa ko blud sanikün.

O Yesus! klödob, das binol is
 plisenik jenik e lifik in föm vina.
 O blud sanikün Dalivala e Sölala
 oba, klinolöd obi de sins valik oba
 e sanükolöd obi!

Plek pos ceinam sanik.

O God e Fat in sül! elensumol plidiko vitimi Abela, edivol viti-möfi Abrahamama lobedik, elenlogol beniko vitimi vitimala Melkisedeka; pluo löfik e lesunik obinom ole vitim Sona balpemetöl ola, kel noe men evedom, soi se lobed kol ol e se löf al obs mens lifi oma as vitimi edäblinom. Velatö! vitim at binom vitim sanikün, loblikün e digikün. O Fat sülik! begob oli, letolöd obi dilsumön len vitim, keli sanälel ies ädäblinom. I letolös dilsumön lanis in klinamöp, pato etis, plo kels al plekön binob debik. Vilolöd tomis omsa müdön dunliküno, u bufumo mosumön löliko, ed ötis lanis it in süli lasumön.

Ven sanälel plekom sölalapleki.

O Fat obas, el in süls! paisanükomöz nem ola! kömomöz lekinan ola! jenomöz vil ola, äslik in sül, i

su tal! Bodi delik obsa givolös obse tudel! e fögivolös obse debis obas, äs id obs aifögivobs debeles obas! e no nindukolös obis in tenüdi, sod aidalivolös obsi de bad! Jenosöd.

Ven sanälel blekom vitimabodi.

O Yesus, Dalival oba! ol ya fa plöfets penotol as püdaplin, ed eblinol velato püdi su tali. Ven äkömol al postelis ola, id epükol kösömo: Püd binomöz ke ols! Sikod i vilob it löfön e plesefön püdi, vilob bufumo liedön nedebäliko, ka dunön negitiko, vilob neki nofön nolo e libaviliko, vilob fögivön viliko neflenes e nofeles valik, vilob nedunön valikosi, kelos kanos glumön e zünön votikanis. Vilob i mekön püdalil bevü feitöls. O Yesus! begob oli, givolöd, das püd paplesefom-la id in fatän e pato in lad oba.

Lä „Agnus Dei“.

O Godaliäm, kel mosumol sinis vola, misaladolöd obi!

O Godaliäm, kel mosumol sinis
vola, misaladolöd obi!

O Godaliäm, kel mosumol sinis
vola, misaladolöd obi!

Lä komün sanälela.

O Yesus, Dalival oba! do no
jenöfo komünob, deno labob vipi,
leladlik, kopi sanikün ola e bludi
sanikün ola luüno segun mod ti-
kälrik juitön. Ol binol gä Godabod
sülik, manäd velatik, kel ekömom
su tali al nulüdön lanis obas al
lif tenüpik. O Yesus! begob oli,
das blibob-la egelo sinaklinik e
digik al juitön oli. Ven begob in
fat obsa demü bod delik, vilob
i pato begön, das dilsumob-la len
bod sülik öt, ven pavokob in tenüpi.
O Yesus! vilobok ke ol balön e ke
ol pebalöl blibön.

Lä „ite missa est“.

O Yesus! cedobok vemo läbik,
das ädalob läsön duname sanikün.

Vilob mekönok digik bena at. No vilob fögetön desinis sanik, kelis emekob, vilob otis i befulön. O Yesus! vilob visitön ofenüno oli in tem sanik ola. Vilob binön memik, das binol plisenik vätopo, e sikod vilob i vätopo so kösitön, das mesedob löfi e plidi ola. Vilob kosekön obi aiplu, dat ob it vedob-la tem Santikäla.

Lä gospel lätik.

O God! denuob bömeti oba, egelo e viliko lilön e befulön valikosi, kelosi glüg sanik ola al klödön e dunön büdom. Vilob i lilön vögi könsiena oba, vilob ati lenlogön as vögi, kel kömom se sül, vilob nedunön valikosi, kelosi nedälom, e befulön valikosi, kelosi büdom. Vilob blibön stanik in tugs, soif gletiks tenüds al sin e meköfiks bösuls demü tug nütliDOMS.

In nem Goda Fata, e Sona e Santikäla. Jenosöd.

Pleks pos levitim sanik.

(Glid lanelik paplekom kilna, tän):

Binolöd paglidöl o jireg, mot misalada, lif obsa, svid obas e spel obsa binolöd paglidöl! Al oli vokobs cils misalöfik fa Eva; al ol seifobs lügöls e dlenöls in nebel at dlenas. O jiplopükel obsa, flekolöd logis misaladik ola al obis e pos misalöf at jonolöd obes Yesusi, fluki peläbädöl kopa ola, o gudlik, o meilädik, o svidik vilgin Maria!

Sanälel: O Godamot sanik, begolöd ple obs!

Pop: Dat ovedobs digiks bömetas Kristusa!

O God, yuf e nämäl obsa! lenlogolöd beniko popi, kel vokom al oli e bevilolöd misaladiko e gudliko demü plovöd fa Mariä vilgin glolik e nebestenik e godamot, e gam ofik Yosef sanik, postels sanik ola Petrus e Paulus e sanikels

valik plekis, kelis plo levotäl sine-
las, plo lib e geilam glüga, mota
sanik obsa segifobs demü Kristus
ot, Sölal obsa. Jenosöd.

O Mikael lanal sanik! jälolöd
obis in komip, binolöd jel obsik
ta badug e bösuls devela.

God büdomöd ome, begobs
miegiko dem atos. Ed ol o plin
tlupas tikälik sülik tömetolöd de-
veli e tikälis badik votik, kels
duzugoms voli dämü lans, me
nämal godik in höli. Jenosöd.

Plek demü läbäd godik plo feluks.

O God! egivol obse kopi, kel
nedom zibi e dlini al nulüd. Ebli-
mol so tali, das pälom planis e
flukis bida alik. Ebüdol obse, das
sötobs votavobön e besovön gluni
in suet logoda.

Lenlogolöd beniko vobi obsa,
keli edunobs jünü ed odunobs fovo.
Läbädolös, üf binos plidik ole e

pöfudik obse, sidi, keli esesovobs. Givolös lanede stomi gönik, äso zesüdos, lömibi dusik e solalunidi in tim pötik. Konsefolös felukis neletü sig laidunöl, luim, lutöf, flod, jod, lefogableks, e valikos, kelos rübos atis. O Fat sülik! givolös obse bodi delik obas. Ol nulüdol gä bödis e nimis valik, kels no voboms e no lesevoms gudi olik, pluo obsi cilis ola. Vilobs getön se fatanam ola, gälökön daniko tefü gud olik, zibi e dlini, kelis legivol obes, in tim pötik e mafiko juitön, id en givön viliko pöfikeles e steifön al plidön ole me lifcunöl, ritik e relik. Bevilölös obis o Fat sülik! me Yesus Kristus, Son ola, Sölal obsa, kel ke ol lifom e regom in balug Santikäla, God de tenüp al tenüpi.

Pop: Jenosöd.

Sanälel: Nem Sölala palobomöz geiliko!

Pop: Nu ed in tim alik.

Sanälel: Yuf obsik kömom
fa Sölal!

Pop: Kel elemekom süli e tali.

Sanälel: Läbäd Goda lemekik,
Fata e Sona e Santikäla kömomöd
ovi obis e flukis gluna, e blibomöd
egelo!

Pop: Jenosöd.

(Sukom sölalaplek bal e glid
lanelik bal.)

Plek bü koef (sinas).

Do edesinob lifön egelo reliko,
dat o God cödikün! dagetob aiplu
plidi ola, so denu esinob, ed oli
Fati gudlikün enofob ko tiks, vöds,
dunams badiks e nedun sötas veütik;
ab nu pönitob sinis valik se lad
lölik, vilob atis koefön känüdiko
e lefulniko, e pönädön jalepiko,
dat o God e Fat gudlikün! denu
dagetob löfi ola. Begob oli su kiens,
givolös beni obe al befulön desinis

oba me Yesus Kristus, Son ola e Sölal löpikün oba. Jenosöd.

Plek pos koef.

O Yesus, Dalival godik oba! Ven äbinol su tal, noe ol it efögivol sineles pönitik, soi eninsiadol sakramedi pönäda, egivol däلامي posteles e züpeles ola, sinis deletön udu bübekipön. Danob ole plo ben at, bi ob it pelibob i de sins oba me sakramed pönäda. Begob oli, givolös, das blibob peliböl de sins in lif lölik e füdo ningolob in süli al lanels e sanikels. Jenosöd.

Plek bü komün.

O Yesus, Dalival godik oba! pos timils nemödik vilol kömön al obi; se kod at binom lad oba gälafulik, ibo kömol al liegön obi ko bens olik ed oli ke ob klubön löliko. Vilob lasumön oli as loti löfikün, feni fiedikün e Sölali löpi-

kün süla e tala. Vilob dunön vali-
kosi, kelos binos löfik ole. Vilob
däblinön ole vitimi fikulikün, üf
flagol somiki; vilob vitimön ole lifi
lölik oba. Kömolöd, kömolöd o
Ditibel lifa tenüpik!

Plek pos komün.

O Yesus, Sölal oba e God vela-
tik! danob ole plo ben nefinik, das
ekömol al klubönok ke ob. Begob
oli, blibolöd egelo lä ob. Vilob lani
obik e kopi oba konsefön klinikis
de sins, dat binoms-la egelo löds
digik ple ol. Vilob oli egelo leplekön,
löfön se lad lölik, dünön ole ko
näms valik, sukön ole in tugs valik,
hedön e deilën ple ol. Jenosöd.

Kluzifavegapleks.

Plek nindugöl.

O Sölal obik Yesus Kristus!
Ebetlidol ko löf gletikün kluzifa-

vegi al deilön ple ob, e deno no säto edivob löfi at; ab adüpo vilob löfi ola nulio meditön. Givolöd beni obe, das dols valik, kelis edasufol su veg et, ninpedomsok-la dibü in ladi oba ed ati al löf gletikün kol ol flämoms-la. Jenosöd.

Stäjöp balid.

Yesus pafecödätom al deil.

Smaliän: O Yesus, leplekobs e pliedobs oli.

Smagesag: Ibo edalivol voli me kluzif sanik ola.

O Yesus! danob ole plo löf gletik ola, das enosol cödäti deila tenüplik, keli efedebob tefü sins oba, e begob oli, givolöd, das vedob-la digik, al labedön lifi tenüplik.

(Sukom bal sölalaplek e bal glid lanelik.)

Stim binomöz Gode Fate, e Sone, e Santikäle! Jenosöd.

Stäjöp telid.

Yesus pavetom ko kluzif.

Smaliän: O Yesus! leplekobs e pliedobs oli!

Smagesag: Ibo edalivol voli me kluzif sanik ola.

O Yesus! givolös beni obe, das no mekob vetikumi kluzifi ola me sins nulik e das kluzifi liedas e dolas oba polob pönädiko e lanimiko.

(Sukom bal sölalaplek e bal glid lanelik.)

Stim binomöz Gode Fate, e Sone, e Santikäle! Jenosöd.

Stäjöp kilid.

Yesus falom balidna ko kluzif.

Smaliän: O Yesus! leplekobs e pliedobs oli!

Smagesag: Ibo edalivol voli me kluzif sanik ola.

O Yesus! if lenlogob, vio vetik kluzif evedom ole, so das sägo ke otik äfalol su gluni, vilob i meditön

e binön memik, das konsien badik,
 deb lönik binom nog gletikum
 bölad, kel meni ofen lepedom löliko.
 O Yesus! begob oli, mekolös, das
 meditam at labom-la seki sätik.

(Sukom bal sölalaplek e bal glid
 lanelik.)

Stim binomöz Gode Fate, e
 Sone, e Santikäle! Jenosöd.

Stäjöp folid.

Yesus kolkömom mote glumik oma.

Smaliän: O Yesus, leplekobs
 e pliedobs oli!

Smagesag: Ibo edalivol voli
 me kluzif sanik ola.

O Yesus! mot ola vilof i mot
 oba binön. Gälokokof tefü läb oba e
 glumofok tefü neläb oba, e glumo-
 fok patiko, ven sinob. Sikod begob
 oli, givolös beni obe, das blibob
 stanik in tugs, e ni oli, ni moti
 palöfölin obsa nog fovo nofob-la.

(Sukom bal sölalaplek e bal glid
 lanelik.)

Stim binomöz Gode Fate, e
Sone, e Santikäle! Jenosöd.

Stäjöp lulid.

Simon se Zürene yufom Yesuse kluzifi
polön.

Smaliän: O Yesus, leplekobs
e pliedobs oli!

Smagesag: Ibo edalivol voli
me kluzif sanik ola.

O Yesus! no ole lepötos, sod te
obe älepötos-la polön kluzifi, bi ob
debel binob, ab dälolöd, das luüno in
mod tikälik su kluzifaveg kopanob
oli, dolis ola nog fefikumo meditob e
plo löf ola nog danikum vedob.

(Sukom bal sölalaplek e bal glid
lanelik.)

Stim binomöz Gode Fate, e
Sone, e Santikäle! Jenosöd.

Stäjöp mälid.

Veronika sanik neluimof Yesuse
logodi.

Smaliän: O Yesus, leplekobs
e pliedobs oli!

Smagesag: Ibo edalivol voli me kluzif sanik ola.

O Yesus! do logod ola ko bludatofs bido pebesovöl äbinom, so deno äbinom in at jön e löfadig gletikün logik, e Veronika sanik ädivofok vemo läbiki, ven ädagetof demagami logoda ola. Id ob sötob binön vemo danik, bi as godalemag pälemekob; ab ag! no egelo eblufobok as godalemag jönik. Enefömotobok sotim in mod difik. O Yesus! begob oli, fögivolös obe e mekolös, das denu vedob godalemag jönik e digik al logön oli de logod al logod.

(Sukom bal sölalaplek e bal glid lanelik.)

Stim binomöz Gode Fate, e Sone, e Santikäle! Jenosöd.

Stäjöp velid.

Yesus falom telidna ko kluzif.

Smaliän: O Yesus, leplekobs e pliedobs oli.

Smagesag: Ibo edalivol voli me kluzif sanik ola.

O Yesus! dido efalol denuamo ko kluzif, ab dub atos te emani-famol, das ol noe God, soi men jenik äbinol, e das bölad kluzifa ola vemo vetik äbinom. Ab ag! ob efalob ofen in sebis sina, e dub fals somik ebölüdob i löfi Goda e speli tefü sül. Sikod begob oli o Yesus! demü fögivam e plese-folös obi neletü fals fovoik. Vilob bufumo falön milna in sebis dibi-kün gluna, ka balna in ledibi sina.

(Sukom bal sölalaplek e bal glid lanelik.)

Stim binomöz Gode Fate, e Sone, e Santikäle! Jenosöd.

Stäjöp jölid.

Yesus kolkömom vomes dlenöl.

Smaliän: O Yesus, leplekobs e pliedobs oli!

Smagesag: Ibo edalivol voli me kluzif sanik ola.

O Yesus! elüvokol vomes glumik: No dlenolsöd tefü ob, sod tefü ols it! Moned at tefom id obi, bi ofen i dlenob, ven no nestipo zesüdik binos, e bi no dlenob, ven vemo zesüdik äbinos-la, os binos, ven sinob. Ibo sin alik binom nof Goda, Fata sülik e fedebom pöni No binom bad gletikum, ka sin. Sikod begob oli o Yesus! mekolös, das dlenob tefü sins oba, ud otis luüno lesevob, pönitob e gudumobok.

(Sukom bal sölalaplek e bal glid lanelik.)

Stim binomöz Gode Fate, e Sone, e Santikäle! Jenosöd.

Stäjöp zülid.

Yesus falom kilidna ko kluzif.

Smaliän: O Yesus, leplekobs e pliedobs oli!

Smagesag: Ibo edalivol voli me kluzif sanik ola.

O Yesus! do taelis e bösulels
 ola älogoms, das ya eliedol dolis
 nesepükik e ya telna se fib efalol
 ko kluzif, no deno efinoms tomön
 oli, e su kluzifaveg ko flaps emo-
 foms oli, jü äfalol kilidna ko kluzif.
 Nemob atosi lejeköfi tuvemik, pluo,
 bi äbinol flen gletikün menas, ab
 ag! debob koefön, das ob it tefü
 flens e benodels oba negiti mäni-
 fodik edunob, sägo tefü ol o Yesus!
 Te, bi binol nefino misaladik, spelob,
 das ofögivol obe.

(Sukom bal sölalaplek e bal glid
 lanelik.)

Stim binomöz Gode Fate, e
 Sone, e Santikäle! Jenosöd.

Stäjöp balsid.

Yesus panüdom de klots oma.

Smaliän: O Yesus! leplekobs
 e pliedobs oli!

Smagesag: Ibo edalivol voli
 me kluzif sanik ola.

O Yesus! as cil böfik ekömol su tali, ed eblibol böfik in lif lölik ola, ab sägo nemödikos, kelosi älabol, pälapinos ole. Ta vil ola ti löliko päsäklotol. Deno no eplonol, e bölüdi edaliedol sufädiko. Vilob sami ola naldunön, vilob i pato, if mutob atis ud etis guedis talik nelabön u bölüdön, no plonön e murön, vilob neki demü lieg glötön, vilob to pöf binön kotenik ko fät oba.

(Sukom bal sölalaplek e bal glid lanelik.)

Stim binomöz Gode Fate, e Sone, e Santikäle! Jenosöd.

Stäjöp balsebalid.

Yesus pakluzüfom.

Smaliän: O Yesus! leplekobs e pliedobs oli!

Smagesag: Ibo edalivol voli me kluzif sanik ola.

O Yesus! noe epolol kluzifi vetik, soi sägo len at edeilöl. Bi

noe men, soi God velatik äbinol,
 if ivilolöv, ikanol-la plesefönok
 neletü dols valik e deil. Edunol
 Gä milagis vemo mödik, sikod, if
 ivilolöv, id ibinos-la nefulik ole,
 liedis valik e deili neletön; ab no
 edunol atosi se lobed kol Fat sülik
 e se löf al obs. Steifob fefiko, so
 ofen kluzifi logob, i meditön löfi
 gletik ola e binön memik, das te
 in kluzif kanob tuvön sani oba.

(Sukom bal sölalaplek e bal glid
 lanelik.)

Stim binomöz Gode Fate, e
 Sone, e Santikäle! Jenosöd.

Stäjöp balsetelid.

Yesus deilom len kluzif.

Smaliän: O Yesus, leplekobs
 e pliedobs oli!

Smagesag: Ibo edalivol voli
 me kluzif sanik ola.

O Yesus! so ofen meditob deili
 ola, vilob i memik binön, das deil

binom fät menas valik. Ob id odeilob, e poso sukum cödef jalepik, lä kel mutob kalügön dö vobäds, vöds e tiks valik oba. Sikod vilob i ple ot nu plepadönok e lifön reliko, tän dalob o Yesus! i spelön deili leläbik kanü melids deila ola.

(Sukum bal sölalaplek e bal glid lanelik.)

Stim binomöz Gode Fate, e Sone, e Santikäle! Jenosöd.

Stäjöp balsekilid.

Yesus padonsumom de kluzif.

Smaliän: O Yesus, leplekobs e pliedobs oli!

Smagesag: Ibo edalivol voli me kluzif sanik ola.

O Yesus! möd taelas e bösulelas ola äbinom gletik, ab nog gletikum äbinom möd flenas e lenlägelas, kels oli älestimoms, äleplekoms e se lad lölik älöfoms. Somiks flens äbinoms Yosef se Arimatäa e Niko-

demus, kels ädonsumoms de kluzif funi sanikün ola ed in sepi magifik äseitoms. I vilob äs mans relik flenis e benodelis oba lestimön e löfön, efe noe in lif omas, soi pos deil omas. Vilob, if binos zesüdik, otis jälön lanimiko, ple ots plekön e vobädis gudik dunön. Vilob o Yesus! pato steifön, das ol su tal aiplu palestimol-la e palöfol-la

(Sukom bal sölalaplek e bal glid lanelik.)

Stim binomöz Gode Fate, e Sone, e Santikäle! Jenosöd.

Stäjöp balsefolid.

Yesus paseitom in sepi.

Smaliän: O Yesus, leplekobs e pliedobs oli!

Smagesag: Ibo edalivol voli me kluzif sanik ola.

O Yesus! sägo in sep emani-famol löfi ola gletikün. Du kop ola in sep äseistom, lan ola ede-

xänom in bihöli al dalivön lanis menas et, kels älifoms reliko ed in spel beata tenüplik ädeiloms. Ab no äbribol in sep, sod, vie eplöfetol, in del kilid elesustanol de edeilöls. Sikod klödob fümikolen bömets valik ola, e spelob, das pos deil id ob olesustanob de edeilöls al lif tenüplik. Jenosöd.

(Sukom bal sölalaplek e bal glid lanelik.)

Stim binomöz Gode Fate, e Sone, e Santikäle! Jenosöd.

Kluzifavegaplek finik.

O Yesus! danob denuamo ole plo valikos, kelosi eliedol al dalivön voli e begob oli, givolöd, das melid liedas e deila ola ple ob no binom pebölüdöl. Jenosöd.

Lelolem marianik.

Plekaleodam.

Balüdo plekon klödakoeffi postelik, täno stim binomöz Gode Fate,

e Sone, e Santikäle, äsi begino, also i nu ed in tenüp. Jenosöd. Tän sukoms glids lanelik kil. Pos vöd „Jesus“ paninyumos balidna: „kel mödomöd klödi in obs“; telidna: „kel stenüdomöd speli in obs“; kilidna: „kel säflamomöd löfi in obs“! e läto sukos: „stim binomöz Gode Fate, e Sone, e Santikäle, äsi begino, also i nu ed in tenüp!“ Jenosöd. Poso sukoms bal sölalaplek e bals glids lanelik, e pos vöd „Jesus“ paninyumom klän balid. Lesümiko paplekoms lemäniks kläns lelolema.

Kläns lelolema gälöfik.

1. Keli o vilgin elegetol fa Santikä!l!
2. Keli o vilgin epolol al Elisabethi!
3. Keli o vilgin emotol in Bethlehem!
4. Keli o vilgin esuvitimol in tem!
5. Keli o vilgin etuvol in tem!

Kläns lelema dolik.

1. Kel esuetom bludi dem obs!
2. Kel peflapom ko tuf tanilas skitik dem obs!
3. Kel peklonom ko spins dem obs!
4. Kel epolom kluzifi vetik dem obs!
5. Kel pekluzüfom dem obs!

Kläns lelema glolik.

1. Kel elesustanom de edeilöls!
2. Kel esuixänom in süli!
3. Kel esedom Santikäli obes!
4. Kel oli o vilgin elasumom in süli!
5. Kel oli o vilgin eklonom in sül!

Plek pos lelolem marianik.

O God! lenlilolöd beniko plekis glüga olik, kel devodi et zälom al stim ola, e givolöd demü misalad olik, das dagetobs atosi, kelosi dabegobs ko klöd lifik kanü Yesus Kristus, Sölal obsa, kel ke ol lifom e regom in balug Santikäla, God de tenüp al tenüpi. Jenosöd.

Dö lelolem lanelik.

Pabeginom at ko klödakoef postelik, bal sölalaplek e bal glid lanelik! täno paplekos balsena: Sanik, sanik, sanik binom Sölal lemödas sülik; sül e tal binoms fuliks ko glol omik! Stim binomöz Gode Fate, e Sone, e Santikäle, äso begino, also i nu ed in tentüp! Jenosöd. Tän sukom bal sölalaplek e bal glid lanelik e denu paplekos balsena: Sanik e. l.

Litanen lauretanik.

- O Sölal, misaladolöd obis!
- O Kristus, misaladolöd obis!
- O Sölal, misaladolöd obis!
- O Kristus, lilolöd obis!
- O Kristus, dalilolöd obis!
- O God Fat in sül!
- O God Son, Dalival vola!
- O God Santikäl!
- O Kilbalod sanik, God baladik!

Misaladolöd
obis!

- O Maria sanik!
 O godamot sanik!
 O vilgin sanik vilginas valik!
 O mot Kristusa!
 O mot bena godik!
 O mot klinikün!
 O mot puedikün!
 O mot nepesiböl!
 O mot nebestenik!
 O mot löfadigik!
 O mot milagik!
 O mot Jafala!
 O mot Dalivala!
 O vilgin sapikün!
 O vilgin stimadigik!
 O vilgin loblik!
 O vilgin valüdik!
 O vilgin gudlik!
 O vilgin fiedik!
 O lok cöda!
 O sied sapa!
 O kod gäla obsa!
 O gef tikälrik!
 O gef stimadigik!

Begolöd ple obs.

- O gef bizugik devoda!
 O lol tikälnik!
 O tüm Davida!
 O tüm nefanögik!
 O dom golüdik!
 O lenaf feda!
 O leyan süla!
 O stel gödelik!
 O san malädikelas!
 O jijelal sinelas!
 O jitolodel glumikelas!
 O yuf kritas!
 O jireg lanelas!
 O jireg glefatas!
 O jireg plöfetas!
 O jireg postelas!
 O jireg matüralas!
 O jireg pliedalas!
 O jireg vilginas!
 O jireg sanikelas valik!
 O jireg pelegetöl nen sten
 nöledasina!
 O jireg lelolema sanik!
 O Godaliäm, kel mosumol sinis vola!
 O Sölal, spalolöd obis!

Begolöd ple obs.

O Godaliäm, kel mosumol sinis vola!

O Sölal, dalilolöd obis!

O Godaliäm, kel mosumol sinis vola!

O Sölal, misaladolöd obis!

O Kristus, lilolöd obis!

O Kristus, dalilolöd obis!

(Sukom bal sölalaplek e bal
glid lanelik.)

Plek.

O godamot sanik! fugobs öned
jeli e jüli ola, no lenevilolöd pleki
obas in zestüds obsa, sod dalivolöd
obis egelo de pöligs valik. O vilgin
glolik e peläbädöl, vom obsik, jime-
del obsa, jiplopükel obsa, lekosivolöd
obis ko Son olik, komedolöd obis
Sone ola, bitopolöd obis Sone olik.

Sanälel: O godamot begolöd
ple obs!

Pop: Dat vedobs digiks böme-
tis Kristusa.

Plek.

O Sölal! begobs oli, das vilol
ningifön beni olik in ladis obsa,

dat obs, kels sukü nun lanela ele-
sevobs menavedi Kristusa, Sona
olik me kluzif e lied oma padukobs
al gloli lesustana kanü Kristus öt,
Sölal obsa Jenosöd.

Sanälel: O Yosef sanik, bego-
löd ple obs!

Pop: Dat vedobs digiks böme-
tis Kristusa!

Plek.

O Sölal! begobs oli, das payufos
obes me melids gama motöla ola
sanikün, dat atos, kelosi näm obik
no kanom getön, palegivos obes
kanü plopük oma. Kel lifol e regol
ko God Fat in balug Santikäla
God de tenüp al tenüpi. Jenosöd.

Plek.

Binolöd paglidöl o jireg, mot
misalada, lif obsik, svid obas e spel
obsa binolöd paglidöl! Al oli vokobs
misalöfiks cils fa Eva, al ol seifobs
lügöls e dlenöls in nebel at dlenas.
Benö! jiplopükel obsa flekolöd logis

misaladik ola al obis e pos misalöf
at jonolöd obes Yesusi, fluki pelä-
bädöl kopa ola, o gudlik, o meilädik,
o svidik vilgin Maria!

Sanälel: O godamot sanik,
begolöd ple obs!

Pop: Dat vedobs digiks böme-
tis Kristusa.

Plek.

O God lemekik e tenüplik, kel
eplepadol kopi e lani vilgina sani-
kün e mota Maria kanü Santikäl
plo löd digik Sona ola, givolöd,
das obs, kels gälokobs meb ofa,
palibobs me plobeg meilädik ofa de
bads füdik e deil tenüplik. Kanü
Yesus Kristusöt, Sölal obsa. Jenosöd.

Plek plo limep.

O God lemekik! begobs oli,
givolöd, das dünan ola N. limep
obsik, kel regami kinäna ma ben
ola elovesumom, id in tugs valik
glofom, dat ko somiks beno pedeköl

mägom vitön lenaudis sinas, bevi-
kodön taelis e benaliegik lükömön
al oli, kel binol veg, velat e lif.

Plek in neds valemik kritefa.

O God lemekik e tenüplik, Fat
sülik! lenlogolöd ko logs misalada
nefinik ola yami, misalöfi e zesüdi
obsa. Misaladolöd valikis klödölis
kritiko, plo kels Son balpemetöl
ola Yesus Kristus, Sölal e Sanal
obsik in namis sinelas ekömom
viliko ed i bludi kostik oma espi-
lom len stam kluzifa sanik. O Fat
benikün! deflekolöd kanü Sölal at
Yesus pöni säto pefedeböl, pöligis
plisenik e füdik, voluti dämik,
plepadi al glig, delidodi, malädis
e timis glumik e töbik. Dalitolöd
e stenüdolöd in gudikos alik löpefis
e sölelis tikälrik e volik, dat födoms
valikosi, kelos mägos plöbön al
stim godik ola, al san obsik ed al
püd tuggedik e benug kritefa. O God
püda! gevolöd obes baladi gitik

in klöd nen slitam e teilam. Levotälolöd ladis obas al pönäd velatik e gudikumam lifa obsa. Säflamolöd in obs fili löfa al ol. Givolöd obes pötüti e zili al cöd alik, dat obs as cils lobedik in lif e deil binobs lesumiks e plidiks ole. Begobs i, modo vilol o God! das begobs, plo flens e neflens obsa, plo saunikels e malädikels, plo krits glumik e misalöfik valik, plo liföls ed edeilöls. O Sölal! pakomedom egelo dun e letön obsa, täg e kodöt obsa, lif e deilön obsa. Letolöd obis te beni olik is juitön ed uso ko pesevälöls valik dagetön, das mägobs lobön e stimön oli in gäl tenüpi. O Sölal, Fat sülik! gevölöd atosi obes kanü Yesus Kristus, Son löfik ola, Sölal e Sanal obsa, kel ke ol e Santikäl as God leigik lifom e regom in tenüpi. Jenosöd.

(Sukoms lul sölalapleks e lul glids lanelik.)

Litanen al sanikels valik.

- O Sölal, misaladolöd obis!
 O Kristus, misaladolöd obis!
 O Sölal, misaladolöd obis!
 O Kristus, lilolöd obis!
 O Kristus, dalilolöd obis!
 O God Fat in sül!
 O God Son, Dalival vola!
 O God Santikäl!
 O Kilbalod sanik, God ba-
 ladik!
 O Maria sanik!
 O godamot sanik!
 O vilgin sanik vilginas valik!
 O Mikael sanik!
 O Gabriel sanik!
 O Rafael sanik!
 O lanels e lanals sanik valik!
 Begolsöd ple obs.
 O kors sanik valik tikälas beatik!
 Begolsöd ple obs.
 O Yohanes sanik, godavatel!
 Begolöd ple obs.

} Misaladolöd obis.
 } Begolöd ple obs.

O Yosefus sanik!

Begolöd ple obs.

O glefats e plöfets sanik valik!

Begolsöd ple obs.

O Petrus sanik!

O Paulus sanik!

O Andreas sanik!

O Yakobus sanik!

O Yohanes sanik!

O Tomas sanik!

O Yakobus sanik!

O Filipus sanik!

O Bartolomäus sanik!

O Matäus sanik!

O Simon sanik!

O Tadäus sanik!

O Matias sanik!

O Barnabas sanik!

O Lukas sanik!

O Markus sanik!

O postels e gospelels sanik valik!

Begolsöd ple obs.

O züpels sanik valik Sölala!

Begolsöd ple obs.

Begolöd ple obs.

- O cils sanik nedebik valik!
 Begolsöd ple obs.
- O Stefanus sanik!
 Begolöd ple obs.
- O Laurenzius sanik!
 Begolöd ple obs.
- O Finzenz sanik!
 Begolöd ple obs.
- O Yohanes e Paulus saniks! }
 O Fabian e Sebastian saniks! } Begolsöd ple
 O Kosmas e Damian saniks! } obs.
 O Gervasius e Protasius }
 saniks! }
 O matürals sanik valik! }
 O Sulfester sanik! }
 O Gregor sanik! } Begolöd ple
 O Ambrosius sanik! } obs.
 O Augustinus sanik! }
 O Hieronimus sanik! }
 O Martin sanik! }
 O Nikolaus sanik! }
 O bijops e pliedals sanik valik!
 Begolsöd ple obs.
- O tidels sanik valik!
 Begolsöd ple obs.

De bad alik
 De zun olik
 De sin alik
 De deil süpitik e neniludik
 De neflenäls devela
 De zun, het e vil badik alik
 De mof midäla
 De lelit e lustom
 De bad taladlema
 De glupak, pötüt e klig
 De deil tenüplik
 Dub klän menavedama sanik
 ola
 Dub naköm ola
 Dub motöf ola
 Dub godavat ola e cun sanik
 Dub kluzif ola e liedön
 Dub deil ola e sepam ola
 Dub lesustan sanik ola
 Dub suixänön milagik ola
 Dub naköm Santikäla tloedela
 In del cödefa

O Sölal, dalivolöd obis!

Obs sinels pöfik

Begobs oli, dalilolöd obis!

- Das spalol obis
 Das fögivol obes
 Das vilol blinön obis al pö-
 nädi velatik
 Das vilol regön e konsefön
 glügi sanik ola
 Das vilol konsefön jepani
 löpikün postelik e calis
 valik glüga in rel sanik
 ola
 Das vilol miegön taelis glüga
 Das vilol jelön limepi obsa
 Das vilol gevön püdi e balifi
 velatik reges e plines
 kritik
 Das vilol gevön püdi e balifi
 pope kritik
 Das vilol stenüdön e konse-
 fön obis it in dün sanik
 ola
 Das vilol geilön ladälis obas
 al desidis sülük
 Das mesedol benodelis valik
 obsa ko gueds tenüpick

Begobs oli, dalilölöd obis!

Das vilol plesefön lanis obas	}	Begobs oli, dalilolöd obis!
e lanis blodas, flenas e		
benodelas obsa neletü		
kodemüb tenü-pik		
Das vilol givön e konsefön	}	
flukis gluna		
Das vilol gevön takedi tenü-		
pik klödeles kritik edei-	}	
löl valik		
Das vilol dalilön obis	}	
O Godason		
O Godaliäm, kel mosumol sinis vola!	}	
O Sölal, spalolöd obis!		
O Godaliäm, kel mosumol sinis vola!	}	
O Sölal, dalilolöd obis!		
O Godaliäm, kel mosumol sinis vola!	}	
O Sölal, misaladolöd obis!		
O Kristus, lilolöd obis!	}	
O Kristus, dalilolöd obis!		
O Sölal, misaladolöd obis!	}	
O Kristus, misaladolöd obis!		
O Sölal, misaladolöd obis!	}	
(Sukom bal sölalaplek e bal		
glid lanelik.)		

Psam mäsezülid.

O God memolöd al yufön obe,
o Sölal spidolöd al yufön obe!

Se jem paledomsöd e pajemo-
domsöd, kels viloms dämön lani oba!

Yilomsöd ed in jem stanomsöd,
kels viloms badliko obe!

Se jem peledöls detlidomsöd,
suno, kels sagoms obe: So dütos,
so dütos!

Ab valiks, kels sükoms oli,
yubomsöd ed in ol gälokomsöd, e
kels löfoms sani ola, sagomsöd
levelo: Sölal palobomöd vemo!

Ab binob nedik e pöfik, o God
yufolöd obe!

Ibo ol binol yufel e dalival obik,
o Sölal, no stebolöd tu lonedo!

Stim binomöz Fate, e Sone, e
Santikäle!

Äs äbinos in begin, ed adüpo,
ed egelo, ed in tenüp. Jenosöd.

Sanälel: Mekolöd dünanis ola
beatikis!

Pop: Kels speloms su ol, o God oba!

Sanälel: O Sölal, binolöd obes tüm stenüdik!

Pop: Ta neflens obas.

Sanälel: Nos letolöd kanön taeli ta obs!

Pop: E cil baduga no dämo-möd obis!

Sanälel: O Sölal, no dunolöd ke obs segun sins obas!

Pop: E no bläfolöd obes segun badugs obas:

Sanälel: Plekobsöd plo jepel löpikün obas N.

Pop: Sölal konsefomöd e belifomöd omi, e mekomöd omi beatik su tal e no lovegivomöd omi in namis taelas oma!

Sanälel: Plekobsöd plo limep obsik N.

Pop: Sölal konsefomöd limepi obsik e dalilomöd obis in del, in kel lenvokobs oli!

Sanälel: Plekobsöd plo benodels obas!

Pop: O Sölal! vilolöd givön lifi tenüpick benodeles valik obsa demü nem ola.

Sanälel: Plekobsöd plo klödels kritik edeilöl valik!

Pop: O Sölal! givolöd takedi tenüpick omes e lit tenüpick litomöd omes.

Sanälel: Letolöd takedön omis in püd!

Pop: Jenosöd.

Sanälel: Plekobsöd i plo blods mobinöls obas!

Pop: O God oba! mekolöd beatikis dūnanis ola, kels speloms su ol.

Sanälel: O Sölal, sedolöd omes yufi de sanub!

Pop: E de Sion jelolöd omis!

Sanälel: O Sölal! belilolöd pleki oba.

Pop: E letolöd luvoki oba kömön al oli!

Plek.

O God, kela löntüg binom, misaladön egelo e spalön, lensumolös pleki lebegik obsa, dat obis e dünanis valik ola, kels obs ko kets sinas petanöls binobs, misalad guda ola dalivom beniko.

O Sölal! begobs oli, lensumolöd pleki miegik obas e spalolöd utis, kels sinis omsa koefoms, dat dage-tobs togo fögivi e püdi segun gud ola.

O Sölal! blöfolös beniko misaladi neseptükik ola obes, dat obis togo de sins valik libol e de pön, keli demü somiks fedebobs, savol.

O God, kel dub sin panofol e dub pönäd palekosilol, lenlogolöd beniko pleki popa miegik ola e mofolöd sukoti lezuna olik, keli fedebobs tefamü sins obas.

O God lemekik, tenüpik! misaladolöd dünani ola N. jepeli löpikün obas, pladali olik su tal e dugolöd omi ma meiläd ola su veg

sana tenüpick, dat kanü yuf olik desidom e lefulom nämiko, kelos binos plidik ole.

O God lemekik! begobs oli, das dünan olik, limep obsa N., kel regami kinäna me ben olik elove-sumom, i glofom in tugs valik, dat ko somiks pedeköl beno, mägom vitön lenaudis sinas, bevikodön taelis, e benaliegik lükömön al oli, kel binol veg, velat e lif.

O God, fa kel desids sanik, konsäls gudik e vobäds cödik rigoms, givolös dünanes olik püdi somik, das lads obsa büdes ola divodiks e tims nuik kanü jel ola neletü dled taela sefiks e takediks binoms.

O God! säflamolöd obsikis loinis e ladis ko flam tikäla ola, dat mägobs dünön ko kop puedik e ko lad klinik plidön ole! O God, Jafal e Dalival klödelas valik! gevolöd lanes dünanas e jidünanas

ola fögivi sinas valik, dat deleti benik, keli egelo evipoms, me plobegs relädik dagetoms.

O Sölal! begobs, das vilolöd fokömön dune obsa ko ben olik ed ati kopanön ko yuf ola, dat pleks e vobäds valik obsa ke ol pabeginoms e ke ol pafinoms.

O God lemekik e tenüpi! kel sölol dö liföls ed edeilöls, e misaladol valikis, kelis se klöd e se vobäds as olikelis lesevol, begobs miegiko oli, das uts, plo kels edesinobs plekis obas segivön, kels uf nog in vol at in lif binoms, ud en edetlidoms, kanü plobeg sanikelas valik ola mägom fögivi sinas valik omas dagetön ma gud ola. Me Yesus Kristus, Sölal obsa, Son ola, kel ke ol lifom e regom in balad Santikäla, God de tenüp al tenüpi. Jenosöd.

(Sukoms plek in neds valemik kritefa, lul sölalapleks e lul glids lanelik.)

Plek al lad sanikün Yesusa.

O Yesus! noe labedol valüdi geilikün e sapi gletikün, soi ladi löfafulikün. No kanom flen fleni, blod blodi, fat soni e mot jisoni so löfön, äslik ol menis löfol ed elöfol. Lad ola binom sied löfa nelönistükikün, ülfon misalada gletikün, kod benas valik. Se löf al mens edonixänol se sül in tali at, se löf al mens ol it men evedol, eliedol dolis lejekik ed edeilöl len kluzif. Plu, ka sanikels e lanels kanoms löfön, ol menis obis elöfol e nek kanom dilsumodi gletikum len fät obsa blöfön, ka ol. In pöts valik, in kels konsäl u tlod, u yuf äzesüdom, ekonsälol, etlodol ed eyufol. Mödiküno nobalna äbinom zesüdik beg lonedik al mofön oli al konsäl, u tlod u yuf Vöds nemödik, vok balnalik blefik äsätoms ofen, das vips yufanedikelas päbefuloms. Sägo eyufol ofen nen valädön

begi. Zakäus änulüdom te vipi in
 lad oma logön oli, ed ol, bi logol
 e nolol valikosi, äbefulol foviko
 vipi et, ed äkômol in domi toladala.
 No lonedo eloegol, das pope et, kel
 äsukom ole in nekulivöpi, änefom
 bod, emofol foviko defi at. No lonedo
 eloegol, das vom malädik kloti ola
 äfinedof, egivol sauni ofe. Egevol
 ofen mödikumosi e gletikumosi,
 ka mens ädabegoms. Mene et, kel
 äbinom liedöl sukü gig, noe egivol
 sauni, soi deleti sinas. Eyufol
 ofen, do ä nolol, das nedan binom
 mesed vola. Emekol ailabölis ruipi
 bals saunikis, do te bal ädanom ole.
 Sägo edlenol dö zif Yerusalem ne-
 pönädik. In milags valik, kelis
 edunol, noe lemeki ola, soi gudi
 nesepekik ola emanifamol e sikod
 no binom milag, das so mödiks
 mens lä ol äsükoms tlodi e yufi.
 Mens valik älesevoms, das ol o
 Yesus! labedol ladi sanikün e

gudlikün. O Yesus, Sanal obik! id ob vilob sükön, stimön e löfön ladi ola. Steifi lölik oba vilob te luki dugön, das no fovo sinob, dat plidob ole e dat gälob oli plu e plu. Nos votikosi vilob dalöpön obe, ka löfi lada ola.

Beg al lad sanik godamota Maria.

O Maria, vilgin sanik! no sibinom lad bal, kel binom so vemo sümik lade Yesusa, ka lad ola. Lad ola sümom lade Dalivala vola len nedeb, len devod, len mieg, misalad e lekosilam. O Maria sanik! Ol elöfol noe Yesusi, Soni ola, Fati sülük e Santikäli, flenis, benodelis e palefanis ola, soi menis valik, sägo neflenis e nofelis ola. Plä God nek gälokom so vemo dö läb menas, e nek paglumom so vemo dö neläb otikas, ka ol. Lied smalikün menas kodom ole doli gletikün,

plobeg oma. O sanikel N.! kela nemi labob, ol ebinol i men, äslik ob ko nöledasin e slop al sin pemotöl, emutol i komipön ta taelis sana, ta devel, ta mens badik e ta midäl; ab ekomipol läbo, ebevikodol taelis valik, no edünol vole, sod te Gode, efe dutliko e fiediko, evitol sinis e pöligis sinik, esikolok in tugs valik. Ol eplesefol klinöfi lada, ebinol devodik lä pleks, ebinol mafik in juit ziba e dlina, ebinol danik plo bens e benods valik, emanifamol sufädi gletikün in lieds, elöfol Godi plu valikos e kemenis äslik oli it. Nu binol in süil, labol siedi bevü lanels e sanikels, logol Godi, juitol püdi tenüpik e gälis neseptükik, e vips valik ola pelefuloms. If meditob beati ola, dagleipom id obi flag gletik al kömön usi, kö ol nu binol. Sikod vilob i lifi oba fomön segun lif ola, vilob fölön büdis

valik Goda e glüga sanik, plägön lobedi, dani, misaladi e tugis lemänik valik. O jelasanikel! ol binol flen Goda, labol göni e löfi oma, dabegolöd beni obe, das vedob digik nema ola, das befulob i desinis oba, das lifob äs sanikel e pos deil oba palasumob in tagedi sanikelas valik. Jenosöd.

Plek bü lefid.

Nolob, das men no lifom al fidön e dlinön, sod fidom e dlinom al lifön. Nolob sepükadi postela: Va fidols u dlinols u vobols, u dunols aikelosi, so dunolsöd. atosi al stim Goda! Nolob, das Dalival godik it etidom plekön demü bod delik. Sikod begob oli o Fat sülik! givolöd obe noe tudel, soi in del alik, kelos binos obe zesüdik len zib e dlin. Givolöd obe noe zibi, kel nulüdom kopi, soi zibi, kel

nulüdom lani al lif tenüfik. Givolöd e läbädolöd valikosi, kelosi nedoms binans lifik valik al lifön. Nevelo vilob fögetön, das ol binol ditibel givas gudik valik, e vilob egelo zibi e dlini te mafiko juitön, äslik ol vilol e binos zesüdik obe. Stim binomöz Gode Fate, e Sone, a Santikäle! Jenosöd.

Plek pos lefid.

Danob o God Fat plo zibs e dlins, kelis egetob se nams ola. Gälokob levemo tefü gud gletik ola. Bi näms oba pestenüdoms e pemödoms, vilob i fövön denu vobädis oba, ed if binos mögik, lefulön. Vilob id atosi, kelosi len zib e dlin no it nedob, nedikeles votik givön, e kemenes oba as sam binön in dan, maföf e misalad. Denu binomöz stim Gode Fate, e Sone, e Santikäle! Jenosöd.

Plek vendelik.

O God gletik e gudlikün! Kienöl danob ole se lad lölik oba plo gudi-kos alik, kelosi eblöfol tudel obe. Danob plo zib e dlin, plo konsefön sauni e nämis valik kopa e lana, plo ningivams e dalitams sanik valik, plo jel e jül ola e plo bens votik valik. Begob oli, plesefolös obi in neit nilkömöl neletü pölign valik kopa e lana, givolös slipi stenüdöl obe e modelo dagalöni yofik. Jenosöd.

In nem Goda Fata, e Sona, e Santikäla. Jenosöd.



Ninalised.

	Flan
Büpuked	3
Plek gödelik	3
Sölalaplek u Fat obas	4
Glid lanelik	4
Lanel Sölala u plek lä glökön al plek	4
In dödel: Plek al meb deilatlepa Kristusa	5
In flidel: Plek al meb deila Kristusa .	6
Klödakoef postelik	6
Klödapläg	7
Spelapläg	8
Löfapläg	9
Levitimapleks	10
Plek pos levitim sanik	22
Plek demü läbäd godik plo feluks .	23
Plek bü koef	25
Plek pos koef	26
Plek bü komün	26

Plek pos komün	27
Kluzifavegapleks	27
Lelolem marianik	40
Dö lelolem lanelik	43
Litanen lauretanik	43
Litanen al sanikels valik	51
Plek al lad sanikün Yesusa	64
Beg al lad sanik godamota Maria	66
Beg al jelalanel sanik ^s	68
Beg al nemasanikel	70
Plek bü lefid	72
Plek pos lefid	73
Plek vendelik	74

